

Dus interessents pigl object ingantau

La societad Ustria Cuolm Sura GmbH ha cumprau l'ustria a Cuolm Sura

DA GIUSEP VENZIN

■ **L'Ustria Cuolm Sura ei vegnida ingantada il venderdis vargau per 630 000 francs. Quella summa ha la societad Ustria Cuolm Sura GmbH pagau ed il commember dil cussegl d'administraziun dalla societad Rudolf Hug da Oberrohrdorf ha motivau la cumpra cugl interess pil beinstar da Cuolm Sura, Surcuolm e la regiun. Mustgas digl object ingantau havess era Angelica Desax da Dardin giu. Ella meina actualmeins l'ustria Bündner Rigi ella vischinonza dalla ustria ingantada. Il prezi lantschau dil representant dalla banca Credit Suisse era 460 000 francs. Igl object era engreviaus cun hipotecas d'emprema e secunda classa ella altezia totala da rodund in milliuns francs. Cun 630 000 francs pagan ils novs possessurs rodund 100 000 francs pli pauc che la summa da schazetg. Quella ei 725 800 francs.**

Grond interess

La sala dalla casa cumin era fullanada il venderdis suentermeizdi. Meins igl interess pigl object che las marveglias ei stau il motiv per la preschientscha. Igl ingant ha cuzzau paucas minutas. Avon igl ingant ha Rudolf Hug dumandau schebein ei seigi era pusseivel da construir a Cuolm Sura habitaziuns da vacanzas. Quei ha il canzlist communal da Surcuolm Zinti Brunold sclariu. Sin fundament dalla planisaziun locala revidida ei quei buca pusseivel. Allura ha igl ingantader Albert Chi-

stell lantschau igl ingant digl object cun ina surfatscha totala da 8500 meters quadrat. Suenten l'offerta dil representant dalla Banca Credit Suisse ha Rudolf Hug offeriu 470 000 francs, en scalems da mingamai 10 000 francs sco pretendiu digl ingantader, ei la summa vegnida catschada tochen tier 630 000 francs.

La societad Ustria Cuolm Sura GmbH ha menau l'ustria gia igl unviern vargau suenter che l'anteriura societad Cuolm Sura AG haveva schau ir bancrut il menaschi. Rudolf Hug ha menziunau il grond engaschi da Zinti Brunold e sia famiglia pil beinreussir dalla ustria igl unviern vargau. Igl interpretider posseda a Surcuolm ina casa da vacanzas ed ei commember dalla nova societad. Sco el ha detg duei l'ustria vegnir menada vinavon sco tochen dacheu. Investiziuns alla gronda seigien buca planisadas ed era buca necessarias. Rudolf Hug quenta cun investiziuns da rodund 50 000 francs. Quellas ein denter auter necessarias sin fundament da pretensiuns dalla segirada da baghetgs. La societad va proximameins alla tscherca d'in ustier pigl object ingantau. La Societad Ustria Cuolm Sura GmbH cun quater acziunaris ei denter temps engroundida cun ulteriurs tschun acziunaris.

In interpretider da num e pum

Rudolf Hug ei en Surselva ina persuna meins enconuschenta. Tonpli eis el quei sin palancau nazional. Aschia ei igl um da 58 onns commember dil cussegl d'administraziun dalla Axpo e commember dal-



L'ustria Cuolm Sura ei en novs mauns. Per 630 000 francs ha la societad Ustria Cuolm Sura GmbH ingantau il venderdis igl object cun ina surfatscha da varga 8000 meters quadrat e schazegiada cun 725 800 francs.

FOTO E. CADUFF

la suprastanza da Economiesuisse. Sco interpretider s'engascha Rudolf Hug sil sector dalla tecnica d'electronica ed ei possessur e president dil cussegl d'administraziun da HT-Holding SA a Dättwil el cantun Argovia. Avon quater onns ha il magasin GEO purtretau igl interpretider ed inventader Rudolf Hug en ina contribuziun da pliras paginas. In dils hobis dad

el ei fotografar. Da quei hobi relata la pagina d'internet www.rudolf-hug.ch. Leu ha il bab da tschun affons da duas letgs publicau fotografias fatgas sin ses viadis a Grönland, ellas Indias, a Myanmar, a Peru e Bolivia ed ella Africa dil sid.

Collaboraziun cullas pendicularas

Il president dil cussegl d'administraziun

dallas Pendicularas Mundaun Josef Brunner ei staus satisfatgs dalla vendita dalla ustria Cuolm Sura: «Nus havein giu negin interess da cumprar igl object», di el. Rudolf Hug ha puntuau l'impurtonza d'ina stretga collaboraziun cullas pendicularas. El ei dil meini ch'ei drovi baul ni tard era a Cuolm Sura indrezs d'ennevar artificialmeins.

Mirau il film cugl actur principal

Kino-Open Air a Sagogn cugl actur Bruno Cathomas

■ (gv) Sagogn ha festivau la davosa fin d'jamna il giubileum Kino Open culla presentaziun dils dus films «Chicken Mexicaine» e cun «Hair». Il film «Chicken Mexicaine» han rodund 150 amigts dil film saviu mirar il venderdis sera ensemble cugl actur principal Bruno Cathomas. El ha passentau entgins dis da vacanzas a Laax ed ha mussau a ses amigts sia patria. Pli ditg vegn igl actur premiau dacuort sco meglier actur svizzer a passentiar igl onn proxim en Surselva. El gioga el giug el liber «Siemi dalla notg da stad» da Shakespeare daus a Laax e siara aschidadir il tscherchel. A caschun dil giug el liber «Romeo e Giulietta» la stad 1988 ha la carriera da Bruno Cathomas numnadameins entschiet. Actualmeins brigliescha el a Turig ella rolla da Macbeth. Dasperas eis el engaschus a Berlin alla «Schaubühne» ed ha era registrau in film el Luxemburg.

Success ei relativ

Roby – giugau da Bruno Cathomas – enconuscha il plan da menu dalla perschun. Il mardis datti poulet mexican. Il film descriva la veta en perschun. Leu sesa Robi per differents rapiments in castig da



Igl actur principal da «Chicken Mexicaine» Bruno Cathomas en discuors cul president dalla «Pro Sagogn» Aluis Poltéra. Il film ei vegenis presentaus il venderdis a caschun dil «Kino Open Air Sagogn.»

FOTO G. VENZIN

dudisch onns. Buca schi ditg ei Bruno Cathomas staus en perschun per registrar il film, mo quei temps – tschun jamnas – numna igl actur in temps difficil che ha dau ad el sil stumi respectiv silla psica.

Il film dil reschissur svizzer Armin Biehler ei buc in film da success. La critica attribuescha quei fatg alla munconza da tensiun. Il reschissur emprovi da sfurzar la dramaturgia. Ils dialogs seigien era buca diltut filai ed alla fin seigi il film trats al liunga. Il criticher Andreas Hutter dat denton bunas notas agl actur principal Bruno Cathomas.

Igl actur sez ei buca surstaus ch'il film hagi buca success: «Jeu sundel surstaus ch'il film ei insumma vegnius els kinos.» Il success sco tal valetescha Bruno Cathomas sco relativ. Era el temps da success emprovi el da buca piarder la relaziun culla realitad: «Mes amigts fan attent mei cura ch'jeu viel sgular.» Sch'ei seigi buca grev da catar buns amigts ella scena da teater e film: «Ins sto tscherchar els.» Pli fetg che la veta els cuolms hagi siu emprendissadi sco serrer ella fabrica da Domat formau el: «Per mia veta eis ei stau d'avantatg da haver fatg in emprendissadi, da haver fatg experientschas era ordvart la scena da film e teater.»

Avon la presentaziun dil film cun Bruno Cathomas ha il cantautur Luis Coray da Laax cantau entginas canzuns. Il jazz da Luis ei divertents, el suna la ghitara a moda virtuosa. Secapescha ha el era sunau «Sendas Oranschas», in toc da sia plemma e duvraus el film «Chicken Mexicaine».

Alexi e Marcus e Hair

La sonda ha il Club da film Glion presentau il film Hair dil reschissur Milos Forman. Quei film registraus 1977 ha contonschiu status da cult. El descriva l'era da Flower-Power, la generaziun traumatizada dalla uiara dil Vietnam che s'engascha cun cavels liungs e fluras per la pasch. Sis onns pli tard han Alexi Nay e Marcus Hobi fatg furore cun canzuns romontschas. Text e melodias han tucceau la noda dil temps ed enteifer cuort han era ils dus trubadurs contonschiu status da cult en patria romonscha. Il success a caschun da lur comeback suenter 18 onns conferma il status da cult.



Il cantautur Luis Coray ha divertiu cun canzuns da jazz. El suna la ghitara a moda virtuosa.

■ DEGEN

In excellent quen communal

(gv) Ils vischins dalla vischnaunca da Degen han approbau il venderdis vargau il quen communal digl onn vargau. Quei quen siara tier entradas da 1,46 milliuns cun in gudogn da 107 000 francs. La vischnaunca ha fatg deducziuns ella summa totala da 557 000 francs. Il quen d'investiziuns siara cun 450 000 francs investiziuns brut e 228 000 francs investiziuns net. Ils vischins da Degen han medemameins approbau la revisiun dil reglament davart la vendita da parcelas da baghegiar a «Bual da Rumein». Tochen dacheu muntava il prezi per meter quadrat 35 francs. Da niev munta il prezi 80 francs per meter quadrat per la construcziun da casas da vacanzas. Culla medema caschun han ils vischins approbau la vendita dil sulom per ina casa da treis familias. Ils dus credits giavischai per la sanaziun dil center communal da 88 000 francs e per la midada digl anteriur local dils pumpiers a Vattiz en in post da recepir latg da 23 000 francs han ils vischins concediu.

■ VELLA

Investiziuns da 1,4 milliuns francs

(gv) Il quen communal dalla vischnaunca da Vella siara tier entradas da 3,243 milliuns cun in gudogn da 42 000 francs. Ils vischins han approbau quei quen a caschun d'ina radunonza communal la gievgia vargada. La vischnaunca ha fatg deducziuns ella summa totala da 554 000 francs. Las investiziuns fatgas igl onn vargau muntan a 1,438 milliuns brut, las investiziuns net 902 000 francs. Ils vischins han concediu la gievgia vargada in credit da 30 000 francs per catamar la via da Bellania a Pleif e per segirar il grep a Pleif. Allas Pendicularas Péz Mundaun SA han ils vischins dau il dretg da construir igl indrez d'ennevar sil tschancun da Hitzegen a Vella ed era il dretg da reter aua.